

Bunga tekoma bermusim produk pelancongan unik Kedah

Alor Setar: Kerajaan negeri akan menjadikan fenomena bunga tekoma di bandar raya ini sebagai produk pelancongan bermusim rasmi menerusi konsep 'Musim Sakura Kedah'.

Pengerusi Jawatankuasa Pelancongan, Kebudayaan dan Keusahawanan negeri Kedah, Datuk Mohd Salleh Saidin berkata, inisiatif bertujuan mengangkat keunikan musim bunga pokok tekoma atau tabebuia rosea sebagai tarikan khas negeri ini.

Katanya, fenomena lazimnya berlaku antara Februari hingga April ketika cuaca panas dan kemarau itu menyaksikan pokok tekoma menggugurkan daun sebelum dipenuhi bunga merah jambu serta putih yang mekar serentak.

"Tempoh berbunga hanya sekitar satu hingga dua minggu, namun dalam tempoh singkat itu, suasana sepanjang beberapa laluan utama di Alor Setar berubah wajah dengan hamparan bunga yang gugur seperti permaidani.

"Keindahan menjadi an-



FENOMENA lazim berlaku antara Februari hingga April berkonsepkan Musim Sakura Kedah.

tara musim paling dinantikan penduduk tempatan setiap tahun dan menarik kehadiran pelawat domestik," katanya ketika dihubungi di sini, semalam.

Mohd Salleh berkata, penjenamaan rasmi sebagai 'Musim Sakura Kedah' mampu memperkukuh imej negeri ini sebagai destinasi pelancongan unik yang mempunyai tarikan alam bermusim setanding destinasi antarabangsa.

Katanya, fenomena itu membantu mempromosikan Alor Setar secara tidak langsung apabila gambar dan video dikongsi secara meluas di media sosial.

"Kerajaan negeri melihat potensi besar memperkayakan promosi serta perancangan supaya fenomena itu dapat dimanfaatkan sepenuhnya oleh industri pelancongan tempatan.

"Pokok tekoma ini yang berasal dari Amerika Tengah dan Amerika Selatan itu sesuai dengan iklim tropika panas negara ini dan mampu mencapai ketinggian sehingga 30 meter," jelas beliau.